

## BAB IV

### HAL-HAL SELEPAS PERCERAIAN

#### Pengenalan

Dalam bab ini, saya akan membincangkan tentang kesan-kesan perceraian dan peruntukan-peruntukan yang ada dalam Islam bagi menangani masalah-masalah ini.

#### 4.1 Kesan-Kesan Perceraian

Walaupun perceraian adalah jalan keluar terakhir bagi sebuah rumahtangga yang berkonflik, namun pada keseluruhannya ia lebih banyak membawa kesan yang negatif kepada setiap pihak yang terlibat. Kesan-kesan ini melibatkan 4 pihak iaitu:

- (a) Suami
- (b) Isteri
- (c) Anak-anak
- (d) Keluarga kedua belah pihak

#### 4.1.1 Kesan Terhadap Suami

Kesan terhadap suami dapat dilihat dari beberapa segi. Satu daripadanya ialah perceraian itu menyebabkan ia terpisah dari anak-anaknya jika anak-anak diletakkan dalam jagaan isteri (Zainab Jusoh, 1988: 76). Walaupun suami ada hak untuk menemui anak-anaknya tetapi apalah sangat kemesraan yang dapat dijalinkan dalam masa beberapa hari sebulan atau seminggu berbanding dengan setiap hari

sebelum perceraian itu berlaku. Kemesraan bapa dan anak-anak menjadi longgar dan bapa akan merasakan kehilangan anak-anaknya.

Selain dari itu, seandainya perceraian berlaku di masa suami masih menyayangi isterinya, maka suami mungkin akan mengalami tekanan jiwa (Zainab Jusoh, 1988: 76). Di peringkat yang serius, suami boleh diserang 'gila-talak' dan melakukan apa sahaja untuk menghalang bekas isterinya dari berkahwin dengan orang lain.

Kesan lain yang mungkin timbul di kalangan suami ialah ia keberatan untuk mencari pasangan baru kerana serik dengan pengalamannya yang lalu (Azman, 1981: 129).

#### 4.1.2 Kesan Terhadap Isteri

Oleh kerana perceraian mengharamkan persetubuhan antara lelaki dan perempuan yang dulunya suami isteri, maka kedua-dua suami dan isteri akan kehilangan nafkah batin. Selain dari itu, dari segi nafkah zahir pula, setelah tamatnya tempoh edah maka isteri tidak lagi akan ditanggung oleh suaminya dan terpaksa mencari jalan untuk menampung hidupnya sendiri. Keadaan ini sudah tentu tidak mendatangkan masalah kepada isteri yang bekerja dan bergaji besar. Tetapi bagi isteri yang selama ini menjadi suri rumahtangga sepenuh masa, nafkah zahir akan menjadi masalah yang besar kepadanya. Keadaan menjadi lebih buruk jika anak-anak berada dalam pemeliharaannya kerana walaupun ada nafkah anak yang dimestikan suami membayarnya tetapi kadangkala ini tidak dilakukan oleh suami. Jika ada sekalipun, jumlahnya seringkali tidak mencukupi. Maka si isteri terpaksa

mencari jalan untuk mendapatkan wang bagi menanggung dirinya dan anak-anaknya.

Akan tetapi, memandangkan anak-anak berada di dalam pemeliharaannya, bagaimanakah isteri itu boleh mencari kerja kerana siapakah yang bakal menjaga anak-anaknya sepeninggalannya pergi bekerja? Dari sini dapat dilihat betapa buruknya kesan perceraian kepada para isteri. Pernah berlaku satu kes (bukan melibatkan responden dalam kajian ini) di mana seorang janda ditangkap kerana melacur dan memberi alasan bahawa kegiatannya itu semata-mata untuk mencari wang bagi menanggung anak-anaknya (Star, 1 Jun 1987). Kita tidak tahu sejauhmanakah alasan itu dapat diterima kerana dia mungkin melacur sebagai cara untuk memuaskan nafsu akibat nafkah batin yang telah dinafikan untuknya atau dia mungkin memberi alasan anak-anak tersebut sebagai faktor peringanannya. Walau apapun, ini sudah cukup untuk menunjukkan salah satu kesan langsung yang dialami oleh isteri akibat dari perceraian yang berlaku.

Selain dari itu, para isteri yang bergelar janda ini terpaksa menghadapi isbat sosial (social sanction) atau "stigmatization" (Azman Ahmad Aziz, 1981: 129; Zainab Jusoh, 1988: 70). Ini adalah akibat dari pandangan buruk masyarakat Melayu khasnya terhadap janda. Janda seringkali dipandang serong oleh masyarakat sehinggakan segala yang mereka lakukan dikaitkan dengan niat-niat yang jahat semata-mata. Mungkin ada kebenarannya bahawa ada di kalangan janda-janda itu agak keterlaluan dari segi tingkahlaku mereka. Akan tetapi, sikap ini dapat difahami bila melihat kepada nafkah batin yang dinafikan kepada mereka. Mungkin juga mereka agak agresif semata-mata untuk mencari

pasangan hidup yang baru yang boleh memperbaiki masa depan mereka dan anak-anak. Namun, tidak dapat dinafikan bahawa ramai lagi di kalangan mereka itu yang pandai menjaga maruah diri. Pandangan masyarakat yang serong ini menyukarkan lagi hidup para janda yang memang sedia sukar. Ini mempengaruhi psikologi mereka menyebabkan mereka mengalami tekanan perasaan.

Selain dari itu, sama seperti lelaki yang bercerai, janda juga mungkin keberatan untuk mencari teman baru akibat pengalaman yang dialaminya (Azman Ahmad Aziz, 1981: 129).

#### 4.1.3 Kesan Terhadap Anak-Anak

Walaupun perceraian adalah jalan keluar bagi dua insan yang tidak lagi boleh hidup bersama-sama, malangnya ia melibatkan lebih dari 2 orang tersebut. Anak-anak juga terpaksa menanggung akibat dari perceraian itu. Dalam melihat kesan perceraian kepada anak-anak, Dominian menyatakan,

"... They are deprived, through no fault of their own, of their right to feel secure and loved by the authors of their life, and are frequently manipulated or pushed to take sides with one party." (1968: 120)

Anak-anak akan merasa sedih, kehilangan kasih sayang salah seorang ibubapanya dan menghadapi tekanan perasaan dari perpisahan ini (Azman Ahmad Aziz, 1981: 129). Zainab Jusoh juga menyatakan bahawa salah satu kesan yang dialami oleh anak-anak ialah kehilangan kasih sayang (1988: 77). Ini adalah kerana anak-anak terpaksa memilih dan kadang-kadang ditentukan untuk tinggal bersama salah

seorang dari ibubapanya. Akibatnya, mereka kekurangan kasih sayang dari seorang yang lain. Kehilangan kasih sayang dari ibu atau bapa, terutamanya ibu, memberi kesan negatif terhadap anak-anak di mana ini dikaitkan dengan gangguan personaliti seperti yang ditemui oleh Bowlby dalam kajian psikiatrynya (Dipetik dari Dominian, 1968: 122).

Dalam kajian di Malmo, Sweden, didapati bahawa 6.6% dari budak lelaki yang dimasukkan ke sekolah akhlak adalah dari keluarga yang telah bercerai yang mana peratusan ini adalah empat kali lebih tinggi dari risiko yang dihadapi oleh budak lelaki dari keluarga yang tidak bercerai. Risiko bagi budak perempuan pula adalah lebih rendah dari budak lelaki tetapi ia adalah dua kali lebih tinggi dari yang dihadapi oleh budak perempuan dari keluarga yang tidak bercerai (Dominian, 1968: 123).

Di Malaysia pula, dalam kajian yang dibuat oleh Fong Yut Kuan, penemuan yang sama ditemui di mana lebih ramai delinkuen (33.0%) berasal dari rumahtangga yang hancur berbanding dengan yang bukan delinkuen (3.1%) (Fong, 1982/83: 34).

Dari sini dapatlah dikatakan bahawa kekurangan kasih sayang dari ibu atau bapa boleh membawa kepada delinkuensi di kalangan anak-anak mereka.

Selain dari itu, kekurangan kasih sayang ini boleh membawa kepada tingkahlaku membunuh diri di kemudian hari. Ini dibuktikan dalam satu kajian di mana didapati bahawa mereka yang membunuh diri kebanyakannya pernah mengalami kehilangan ibu atau bapa di masa kecilnya akibat kematian atau perceraian (Dominian, 1968: 123).

#### 4.1.4 Kesan Terhadap Keluarga Kedua Belah Pihak

Perceraian mampu mempengaruhi hubungan di antara lelaki dan perempuan dengan bekas mertua masing-masing, hubungan cucu dengan datuk dan neneknya dan hubungan sesama besan. Seandainya kedua belah pihak dapat menerima hakikat perceraian itu maka hubungan tersebut akan berjalan seperti biasa. Jika sebaliknya berlaku, hubungan itu akan dipenuhi dengan konflik dan berkemungkinan untuk putus (Azman Ahmad Aziz, 1981: 130; Zainab Jusoh, 1988: 79).

Semua kesan-kesan ini tidak terhad kepada individu sahaja tetapi juga membawa akibat yang buruk kepada masyarakat. Suami yang gila talak mungkin menyusahkan masyarakat di sekelilingnya, isteri yang tiada jalan lain untuk mendapat nafkah mungkin akan melibatkan diri dengan industri seks iaitu cara termudah untuk mendapatkan wang manakala anak-anak yang kekurangan kasih sayang mungkin melibatkan diri dengan kegiatan yang tidak sihat seperti delinkuensi, penagihan najis dadah dan sebagainya. Memandangkan akibat-akibat langsung dari perceraian ini, maka langkah-langkah tertentu perlu diambil untuk mengurangkan kadar perceraian. Jika perceraian tidak dapat dielakkan, maka cara-cara untuk mengurangkan kesan-kesan perceraian terhadap setiap individu yang terlibat hendaklah dicari agar mereka dapat menangani tekanan-tekanan itu dengan sebaik-baiknya.

#### 4.2 Peruntukan-Peruntukan Dalam Islam Bagi Mengurang Dan Mengatasi Kesan-Kesan Perceraian

Memandangkan kesan-kesan perceraian yang negatif terhadap individu dan masyarakat, maka dalam Islam ada peruntukan-peruntukan tertentu yang bertujuan untuk mengurangkan dan mengatasi masalah ini.

Di antara peruntukan-peruntukan yang ada ialah:-

- (a) Mut'ah
- (b) Nafkah edah
- (c) Harta sepencarian
- (d) Hak penjagaan anak
- (e) Nafkah anak
- (f) Rujuk
- (g) Nikah semula

#### 4.2.1 Mut'ah

Menurut Imam Hanafi, mut'ah ialah sesuatu yang diberi oleh suami kepada isterinya selepas berlakunya perceraian antara mereka seperti pakaian atau seumpamanya untuk mengurangkan tekanan perasaan isteri (yang diceraikan) dan sebagai barang gantian kesepian isteri oleh sebab perceraian tersebut (Dipetik dari Hassan Salleh, 1989: 157).

Dari definisi yang diberi oleh Imam Hanafi di atas, kita tahu bahawa mut'ah bertujuan untuk mengurangkan tekanan perasaan yang dialami oleh isteri akibat perceraian tersebut. Secara tidak langsung ia mengurangkan kesan perceraian ke atas isteri.

Ada beberapa pendapat yang berbeza tentang pemberian mut'ah kepada isteri yang diceraikan. Menurut Mazhab Shafie, mut'ah wajib diberi kepada bekas isteri walaupun perceraian berlaku sebelum disetubuhi (Salleh Ismail, 1988: 164) dan sebelum ditentukan maskahwinnya (Ahmad Ibrahim, 1965: 223). Ahmad Ibrahim juga menyatakan bahawa mut'ah tidak wajib dalam kes di mana maskahwin telah diberi dan

diceraikan sebelum disetubuhi dan di mana wanita itu sendiri yang minta diceraikan atau wanita itu sendiri yang menyebabkan perceraian tersebut (1965: 223-224).

Berbagai pandangan ini menyebabkan kekeliruan di kalangan masyarakat Islam. Untuk mengelakkan kekeliruan ini, sebuah jadual telah dikeluarkan bagi kegunaan seluruh Malaya iaitu "Jadual Perkara-Perkara Yang Wajib atau Tidak Ke Atas Perempuan Yang Bercerai Dengan Suaminya dan Hukum-Hukum Yang Wajib atau Tidak Ke Atas Suaminya" (Lampiran Q). Jadual ini antara lain menunjukkan hukum wajib atau tidak mut'ah ke atas isteri dalam setiap kes perceraian.

Nilai mut'ah ialah setengah dari maskahwin yang diterima semasa berkahwin dan jika suami memberi lebih dari jumlah itu maka ia dianggap sebagai derma suami kepada bekas isterinya (Salleh Ismail, 1988: 164). Mut'ah boleh diberi dalam bentuk pakaian, wang dan lain-lain yang senilai dengannya (Salleh Ismail, 1988: 164).

Memandangkan hikmah di sebalik mut'ah ini maka Akta Undang-Undang Keluarga Islam 1984 memperuntukkan bahawa isteri yang diceraikan boleh menuntut mut'ah dari suaminya melalui Mahkamah Syariah (New Straits Times, 12 Mac 1986). Sebelum mahkamah memberi kebenaran untuk bercerai, ia akan membuat keputusan berkait dengan mut'ah untuk isteri tersebut yang mana jumlah mut'ah itu bergantung kepada jangkamasa perkahwinan, status pekerjaan, sebab-sebab perceraian, kesan perceraian ke atas isteri dan sebagainya (New Straits Times, 23 Februari 1987).



Dalam kajian yang saya lakukan, tiada butir-butir tentang mut'ah dalam borang keterangan cerai tersebut. Jadi, bolehlah diandaikan bahawa mut'ah tidak diamalkan di kawasan kajian ini.

#### 4.2.2 Nafkah Edah

Sebelum saya menerangkan dengan lebih lanjut tentang pengertian nafkah edah, saya akan jelaskan dahulu tentang pengertian edah.

Menurut Mazhab Shafie, edah merujuk kepada tempoh masa yang ditunggu oleh seseorang perempuan yang bercerai untuk menyakinkan kekosongan rahimnya dari mengandung (Hassan Salleh, 1989: 218).

Edah ini ada tujuan-tujuannya yang tersendiri iaitu:

- (a) Untuk mengelakkan percampuran benih bekas suami dan suami baru sekiranya wanita itu berkahwin lain;
- (b) Untuk memberi peluang kepada suami melakukan rujuk atas isterinya dalam masa edah; dan
- (c) Untuk melahirkan rasa dukacita atas kematian suami dan melahirkan kesetiaan kepadanya setelah menikmati hidup bersama dengannya jika perpisahan adalah disebabkan kematian suami (Salleh Ismail, 1988: 171).

Hassan Salleh (1989: 222-226) menegaskan bahawa jangkamasa edah berbeza dari seorang wanita dengan wanita yang lain. Ini dapat dilihat seperti berikut:-

- (a) Bagi wanita yang diceraikan dalam masa suci, edahnya selesai dengan haid ketiga.
- (b) Bagi wanita yang diceraikan dalam masa haid, edahnya selesai dengan masuknya haid keempat.
- (c) Bagi perempuan yang telah baligh tetapi tidak mengeluarkan haid, perempuan yang telah putus haid dan perempuan kecil yang belum didatangi haid, jangkamasa edahnya ialah 3 bulan.
- (d) Bagi wanita yang diceraikan semasa mengandung, edahnya tamat setelah beliau bersalin.
- (e) Jika kematian suami, edah tamat dengan genapnya 4 bulan 10 hari selepas kematian itu.

Nafkah adalah merujuk kepada saraan yang harus diberi oleh suami kepada isterinya semasa isteri dalam edah (Ahmad K.N., 1971: 849). Walau bagaimanapun, wanita yang kematian suami tidak berhak mendapat nafkah edah (Salleh Ismail, 1988: 164). Nafkah ini hendaklah diberi dalam bentuk makanan, pakaian dan tempat tinggal (Salleh Ismail, 1988: 186) atau dalam bentuk wang tunai yang jumlahnya meliputi perbelanjaan untuk ketiga-tiga keperluan asas itu. Jumlah nafkah edah hendaklah sama dengan jumlah nafkah yang diberi oleh suami sebelum perceraian (Ahmad Ibrahim, 1965: 224). Untuk mendapat gambaran yang lebih jelas tentang nafkah edah yang wajib atau tidak kepada isteri dalam setiap kes, sila rujuk Lampiran Q.

Dalam kajian saya didapati bahawa hanya 4.0% sahaja dari kalangan suami yang sanggup membayar nafkah edah kepada isterinya. Ini dapat dilihat dalam Jadual 4.1 di bawah.

Jadual 4.1: Jadual Kesanggupan Membayar Nafkah Edah

Kesanggupan	Frekuensi	Peratus
Ya	8	4.0
Tidak	194	96.0
JUMLAH	202	100.0

Missing Value: 8

Melihat kepada jumlah nafkah edahnya pula didapati bahawa pada keseluruhannya jumlah nafkah edah adalah kecil. Ini dapat dilihat dari Jadual 4.2. Nilai nafkah edah yang rendah ini mungkin ada kaitannya dengan pendapatan suami yang rendah kerana kebanyakan dari mereka adalah pekerja kampung. Ada juga kemungkinan bahawa nilai nafkah edah yang rendah itu bersepadanan dengan taraf hidup yang rendah di kawasan tersebut.

Nafkah edah bertujuan untuk menjaga kepentingan isteri dalam tempoh edah di mana di masa itu mereka tidak boleh berkahwin lain. Akan tetapi, ketidak-sanggupan ramai suami untuk membayar nafkah ini menunjukkan nasib isteri yang dicerai itu tidak terbela. Walaupun ada segelintir suami yang membayarnya tetapi nilainya adalah terlalu kecil. Oleh kerana perceraian berlaku melalui mahkamah keadaan ini menunjukkan bahawa mahkamah tidak mengambil berat dalam mengarahkan suami membayar nafkah edah itu. Amalan

yang sebegini menyebabkan cara-cara yang sepatutnya diamalkan untuk kepentingan umum seperti yang dianjurkan oleh Islam tidak mendatangkan hasil yang sempurna. Dari sini bolehlah disimpulkan bahawa masyarakat ini membelakangkan suruhan Islam berkait dengan perkara ini.

Jadual 4.2: Jumlah Nafkah Edah

Nafkah Edah (\$)	Frekuensi	Peratus
*0	202	96.2
20	1	0.5
50	1	0.5
>100	1	0.5
Tidak dinyatakan	5	2.3
JUMLAH	210	100.0

\*0: Tidak sanggup dan tidak mengatakan sama ada sanggup atau tidak

#### 4.2.3 Harta Sepencarian

Menurut fatwa negeri Terengganu, harta sepencarian merujuk kepada harta yang diperolehi hasil dari usaha dan pencarian bersama. Maka ia wajib dibahagi menurut kadar sumbangan tenaga masing-masing untuk mendapatkannya dengan tidak menghiraukan sama ada modalnya dikeluarkan oleh suami atau isteri (Othman Ishak, 1981: 108).

Jadi, apabila perceraian berlaku, isteri berhak mendapat bahagiannya dalam harta sepencarian tersebut. Akta Undang-Undang Keluarga Islam 1984 memperuntukkan bahawa seorang janda berhak memiliki setengah dari harta sepencarian jika ia bekerja dan jika

memberi sumbangan kepada perolehan itu. Jika ia tidak bekerja dan tidak memberi sumbangan dalam bentuk wang bagi memiliki sesuatu barang maka ia hanya berhak memiliki sepertiga daripadanya sahaja (New Straits Times, 23 Februari 1987). Dengan adanya peruntukan ini maka harta ini boleh digunakan oleh isteri yang dicerai itu bagi memulakan penghidupan baru.

Walaupun isteri ada hak atas harta sepencarian namun dalam kajian ini tiada data yang menunjukkan amalan pembahagian harta sepencarian ini. Dari sini bolehlah diandaikan bahawa pembahagian harta sepencarian tidak diamalkan di daerah ini.

#### 4.2.4 Hak Penjagaan Anak (Hadanah)

Masalah penjagaan anak sering menjadi bahan pertelingkahan bagi mereka yang bercerai. Anak-anak yang masih kecil dan tidak tahu menguruskan diri mereka perlu mendapatkan pengawasan dan jagaan dari orang lain (Mahmood Zohdi, 1989: 193). Masih kecil bererti belum dapat membezakan antara yang baik dengan yang buruk. Biasanya, kanak-kanak dianggap dapat membezakan antara yang baik dan yang buruk apabila mereka berusia 7 tahun ke atas. Pada peringkat ini, mereka digelar Mumaiyiz.

Imam Hanafi mentakrifkan hadanah sebagai mendidik kanak-kanak yang tidak dapat menguruskan dirinya sendiri menurut umur-umur tertentu oleh orang yang berhak terhadapnya, iaitu daripada kalangan keluarganya (Hassan Salleh, 1989: 237).

Mengikut Mazhab Shafie, bila ibubapa bercerai dan ibunya tidak berkahwin lain, ibu tersebut berhak menjaga anak perempuan sehingga ibu tersebut berkahwin lain manakala anak lelaki akan berada dalam jagaan ibunya sehingga ia berusia 7 tahun. Bila kanak-kanak sudah mumaiyiz, mereka boleh memilih untuk tinggal dengan mana-mana satu dari ibubapanya dengan syarat ibubapa itu tidak gila atau berkelakuan tidak senonoh dan dengan syarat si ibu tidak berkahwin lain (Ahmad Ibrahim, 1965: 235).

Para ulama berpendapat bahawa ibu yang diceraikan paling berhak untuk memelihara dan mengasuh anak-anak yang masih kecil (Mahmood Zohdi, 1987: 193). Dalam keadaan tertentu orang lain juga diberi hak untuk menjaga anak itu. Menurut Undang-Undang Keluarga Islam Wilayah Persekutuan Kuala Lumpur, hak penjagaan anak ini boleh diberi kepada salah seorang dari yang berikut mengikut susunan keutamaannya:-

- (a) Nenek sebelah ibu hingga ke atas peringkatnya
- (b) Bapa
- (c) Nenek sebelah bapa hingga ke atas peringkatnya
- (d) Kakak atau adik perempuan seibu-sebapa
- (e) Kakak atau adik perempuan si ibu
- (f) Kakak atau adik perempuan si bapa
- (g) Anak perempuan dari kakak atau adik perempuan seibu-sebapa
- (h) Anak perempuan dari kakak atau adik perempuan seibu

- (i) Anak perempuan dari kakak atau adik perempuan sebapa
- (j) Emak saudara sebelah ibu
- (k) Emak saudara sebelah bapa
- (l) Waris lelaki yang boleh menjadi warisnya sebagai asabah atau residuari

Dengan adanya hak penjagaan anak yang bukan sahaja diberi kepada ibu tetapi juga kepada mana-mana pihak ibu atau bapa menyebabkan hubungan antara dua keluarga tadi tidak terputus. Salah seorang ibu atau bapa akan sentiasa menemui anak-anaknya dan melaluinya hubungan antara bekas menantu dan bekas mertua dapat diteruskan.

Dalam kajian saya, hak penjagaan anak bukan sahaja diberi kepada ibu, tetapi juga kepada bapa dan datuk di sebelah bapa. Ini dapat dilihat dalam jadual di bawah. Dalam jadual tersebut didapati bahawa dalam majoriti kes, hak penjagaan anak diberi kepada ibu.

Jadual 4.3: Hak Penjagaan Anak

Penjaga	Frekuensi	Peratus
Ibu	84	84.0
Bapa	9	9.0
Datuk sebelah bapa	1	1.0
Bergilir-gilir antara ibubapa	1	1.0
Bilangan anak diberi kepada ibu dan bapa	5	5.0
JUMLAH	100	100.0

Missing Value: 110

#### 4.2.5 Nafkah Anak

Nafkah anak merujuk kepada nafkah bagi membesarkan anak-anak termasuk pakaian, makanan, rawatan, perkhidmatan dan pendidikan mengikut kemampuan bapa (New Straits Times, 23 Februari 1987). Menurut Akta Undang-Undang Keluarga Islam 1984, ayah bertanggungjawab memberi nafkah kepada anaknya sehingga anak itu berusia 18 tahun. Bagi anak yang ingin melanjutkan pelajarannya, ayah bertanggungjawab menanggungnya hingga selesai. Mahkamah Syariah juga berhak mengarahkan pihak ibu memberi sumbangan dalam menanggung anak-anak jika ibu itu mampu (New Straits Times, 12 Mac 1986). Dengan adanya nafkah ini, masa depan anak-anak akan lebih terjamin walaupun ibubapanya sudah bercerai.

Dari Jadual 4.4, didapati bahawa 81.0% dari mereka yang mempunyai anak sanggup memberikan nafkah anak selepas bercerai manakala 19.0% lagi tidak sanggup memberikannya.

Jadual 4.4: Kesanggupan Membayar Nafkah Anak

Kesanggupan	Frekuensi	Peratus
Ya	77	81.0
Tidak	18	19.0
JUMLAH	95	100.0

Missing Value: 115

Telah dikatakan tadi bahawa jumlah nafkah anak ini bergantung kepada kemampuan bapa. Distribusi jumlah nafkah anak dapat dilihat dalam Jadual 4.5.



Jadual 4.5: Jumlah Nafkah Anak

Nafkah (\$)	Frekuensi	Peratus
01 - 20	11	11.6
21 - 40	11	11.6
41 - 60	8	8.4
61 - 80	2	2.1
> 80	4	4.2
Tidak dinyatakan jumlah	41	43.6
Tidak sanggup	18	19.0
<b>JUMLAH</b>	<b>95</b>	<b>100.0</b>

Missing Value: 115

Jadual di atas menunjukkan bahawa jumlah nafkah anak yang diberi tidaklah banyak. Ini mungkin disebabkan oleh faktor ekonomi bapa yang kebanyakannya hanya bekerja kampung. Jumlah nafkah anak yang kecil ini mungkin juga munasabah dengan kos hidup di kawasan tersebut.

#### 4.2.6 Rujuk

Walaupun ada faktor di atas yang dapat mengurangkan tekanan perasaan dan beban yang ditanggung oleh pihak-pihak yang terlibat dalam perceraian tetapi ia tidak dapat menghapuskan segala kesan yang ada. Oleh itu, Islam memperuntukkan satu lagi cara yang boleh menghapuskan segala kesan negatif dari perceraian iaitu rujuk. Selain dari mengatasi kesan perceraian, rujuk juga menjadikan

perceraian sebagai iktibar bagi kehidupan di masa akan datang.

Menurut Mazhab Maliki, rujuk ialah pengembalian isteri yang diceraikan kepada 'ismah (pemeliharaan) suami tanpa memperbaharui akad nikah (Hassan Salleh, 1989: 233).

Bila suami telah menceraikan isterinya dengan satu atau dua talak dengan bentuk yang dibenarkan, rujuk boleh berlaku semasa edah tanpa akad nikah. Rujuk boleh dilakukan dengan menarik kembali dengan rasmi talak yang dijatuhkan atau dengan meneruskan kehidupan berumahtangga (Fyzee, 1964: 149).

Dalam kajian ini didapati bahawa hanya 14.8% responden sahaja yang memanfaatkan rujuk ini sedangkan yang lain tidak. Ini dapat dilihat dalam Jadual 4.6. Dari sini bolehlah diandaikan bahawa rujuk tidak mendapat sambutan yang menggalakkan dari responden di kawasan ini.

Jadual 4.6: Bilangan Pasangan Yang Rujuk

	Frekuensi	Peratus
Rujuk	31	14.8
Nikah semula	1	0.5
Tidak rujuk	177	84.3
Tidak dinyatakan	1	0.5
JUMLAH	210	100.0

Tempoh cerai-rujuk berbeza mengikut pasangan. Ini dapat dilihat dalam Jadual 4.7 di bawah. Dalam keadaan sebenar, tempoh cerai-rujuk yang minimum ialah setengah jam.

Jadual 4.7: Tempoh Cerai-Rujuk

Tempoh (Hari)	Frekuensi	Peratus
1 - 14	10	32.3
15 - 30	9	29.0
31 - 45	5	16.1
46 - 60	3	9.7
61 - 75	3	9.7
76 - 90	1	3.2
JUMLAH	31	100.0

Missing Value: 179

Dari jadual di atas didapati bahawa 59.4% dari mereka yang bercerai, rujuk dalam masa sebulan. Ini menunjukkan bahawa keputusan yang dibuat untuk bercerai adalah keputusan yang terburu-buru kerana dalam masa yang singkat sahaja mereka menyedari kesilapan mereka lalu berbaik semula. Nasib baiklah rujuk dibenarkan dalam Islam, jika tidak sudah tentu kesilapan bercerai itu tidak diperbaiki.

#### 4.2.7 Nikah Semula

Selain dari rujuk, Islam juga membenarkan pasangan suami isteri yang sudah bercerai untuk nikah semula. Dalam kajian ini didapati bahawa hanya satu pasangan sahaja yang nikah semula (Jadual 4.6).

Nikah semula boleh dilakukan dalam dua keadaan. Pertama, bila suami menceraikan isterinya dengan satu atau dua talak dengan bentuk-bentuk yang dibenarkan dan tempoh edah telah tamat, pasangan suami isteri yang hendak bersama kembali hendaklah diakadnikahkan semula.

Kedua, jika suami menceraikan isteri dengan 3 talak, pasangan itu boleh hidup bersama semula jika perkara-perkara berikut dilakukan:-

- (i) Isteri mestilah tunggu tempoh edahnya tamat.
- (ii) Setelah itu, ia berkahwin dengan lelaki lain.
- (iii) Perkahwinan kedua ini mestilah merupakan perkahwinan sebenar dalam ertikata mesti wujud hubungan kelamin antara pasangan suami isteri tersebut.
- (iv) Suami kedua melafazkan talak.
- (v) Isteri tunggu tamat tempoh edah dari perceraian yang kedua.
- (vi) Setelah tamat tempoh edah, barulah si isteri boleh dinikahkan semula dengan bekas suaminya yang pertama.

Jika perkahwinan kedua tidak berlaku, mereka tidak boleh bernikah semula dan anak-anak yang lahir dari perkongsian hidup selepas itu, kalau ia berlaku, dianggap sebagai anak luar nikah (Fyzee, 1964: 149-150).

#### 4.3 Kesimpulan

Perbincangan di atas jelas menunjukkan bahawa perceraian lebih banyak membawa kesan negatif berbanding dengan yang positif kepada mereka yang terlibat: Suami, isteri, anak-anak dan kedua belah keluarga. Kesan-kesan ini tidak terhenti di situ sahaja sebaliknya ia mungkin mengakibatkan masalah sosial yang serius kepada masyarakat. Untuk mengatasinya maka langkah-langkah tertentu perlu diambil agar kadar perceraian dan kesannya dapat dikurangkan.

Memandangkan kesan-kesan buruk yang diakibatkan oleh perceraian maka Islam memperuntukkan beberapa perkara bagi mengawal tekanan perasaan dan beban yang ditanggung oleh mereka yang terlibat.

Dengan adanya mut'ah, nafkah edah dan bahagian dalam harta sepencarian, maka sedikit sebanyak tekanan perasaan isteri yang diceraikan dapat dikurangkan. Apa yang diperolehi dari peruntukan-peruntukan ini dapat digunakan untuk menanggung dirinya sendiri buat sementara waktu sebelum mendapat sumber lain yang lebih tetap.

Hak penjagaan anak yang bukan sahaja diberi kepada ibu kanak-kanak itu tetapi juga kepada kedua belah keluarga dan kebenaran untuk menziarahi anak-anak yang dalam jagaan orang lain itu dapat meneruskan hubungan antara bekas menantu dengan bekas mertua, cucu dengan datuk dan neneknya dan ibu atau bapa dengan anak-anak mereka sendiri. Keadaan ini dapat mengelakkan anak-anak tersebut dari kehilangan kasih sayang dari keluarganya. Nafkah anak pula menjamin bahawa penjaga tidak dibebankan dengan anak-anak yang berada dalam pemeliharaannya.

Kesemua faktor di atas hanya mampu mengurangkan tekanan perasaan dan beban tanggungan mereka yang terlibat tetapi tidak mungkin dapat menghapuskan semua kesan yang ada. Untuk itu Islam membolehkan rujuk dan nikah semula agar pasangan tersebut dapat berdamai semula dan membina kehidupan baru bersama.

Oleh kerana keenam-enam faktor itu membawa banyak faedah dalam menjamin masa depan mereka yang terlibat, maka Akta Undang-Undang Keluarga Islam 1984 telah mengambil kira faktor-faktor tersebut. Walau bagaimanapun, peruntukan-peruntukan yang ada tidak akan membawa apa-apa faedah sekiranya perlaksanaan yang sebaiknya tidak dilakukan. Ini jelas dilihat dalam kajian ini terutama dalam aspek nafkah edah dan nafkah anak yang tidak menunjukkan komitmen yang bersungguh-sungguh baik dari pihak lelaki, perempuan atau mahkamah sendiri. Adalah diharapkan perlaksanaan Akta Undang-Undang Keluarga Islam 1984 akan dapat mengurangkan kadar perceraian di Malaysia dan lebih menjamin masa depan mereka yang terlibat.